

Waani

Pukeri Simiyame

Iyoteparia

Riosi Naera

1 Kúira yomatiamé i'ka wehjoarichi mochikáme. I'ka no'o iyotewachio, aatachi simiyame itapiti aamo nayewemane, kihta ki'tioi i'ka wehjoario, ahjaka yasitokameopua wa'asi, ke'chu naayachisi o'ínia. Puuu aataa ihji aatapua: taamo wa'api pusie tetewaria, taamoo pu'kao keepuka ohjoria; taamoo pu'kao, taamo sekae ahjachi ihcheparia. Ihji te'ta aataa, Eesusi Riosie Weratiame puuu; puuu, Apoe te'ta Riosi Naera puuu, Riosia pukae ahpo Naeraeo, te'ta kaaweruma ahjarikamera taamo ki'yamepua, weemerakamera ahjari. ²Ihji wa'api Riosi Naeraa, i'wa wehjoarichi eenaka tijoetukamepua, taamoo taamo pusie tetewiriamepua; pukachi wa'a tiiachipa teemea, pichiwako tuuyámepua, i'wa wehjoarichi eenáριο. Pu'ka Naera Tijoetukamechi simiyame, aamo nayewatuna teemea. Puuu Naera Tijoetukamea ki wahjiamesi ahjari tiamepua, puuu taamo Noono Riosi tiarichi o'inia tekikamepua, pu'ka tiarichi o'inia tekika weechi eenaka, taamo ahpo tetewitekame. ³Pu'ka te'ta taamo tetewaria, pu'ka te'ta taamo inamuria tiame, aamo nayewatuame teemea, aamóo, wa'achitia tamochitia taamo Noono tewekachi kahtiamечи te'tereka mochtomichiopua, wa'achitia Riosi Taanarachi taamo te'tereka mochtioachitia, wa'achi te'tereka mochtomichiopua, Eesusi Riosie te'ta Weratiamechio. ⁴Wa'a tiame aamo tuuyepame teemea i'ka iyotewachio, pu'ka aamo Riosichi peenia erakoao, epeche ahsepari teerepuawichiopua.

Riosia piipari tahjewari puuua

⁵Eesusi Riosie Weratiame taamo aamo masitenureraa, ihji kaaweruma weemera tuuyewari puuua: Riosia piipari tahjewari, ki'tiameoiopia tiameo, ihtaoi ki kaaweruma tiameo, kiisi oiyameoiopia tiameo, tukaparichio; ihjia te'ta kaawerumache ihsiwa tiamepua. ⁶Pu'ka Riosi ahjama kaawe te'tio tuusaa teeme, nape wa'a chaachapaio ki ka'karuma yooraka ohjosaa teeme, wistuame teeme taamo chaachapario, ki taamo chaachapariachitia ohjoekapa teeme. ⁷Nape uutapachi ohjoresaa teeme kaawe ahpo uukao, Riosichitia uutapachi te'tereka mochitoame teemea, kaawe erakoka mochitoka taamo wahjachi ahjamaoi, Riosi Taanara Eesusio taamo tatakoria te'ta taamo piipateriopia, tísia kokosa aiwaka, ahkasi kurusichi mukukao.

⁸Ki tatakoriwaeme taamo teewasaa teeme, taamo wa'api taamo wihkuiamepua, kihta ki'tiame teemea waikao, taamo pichiwariao. ⁹Nape teemea Riosio taamo tatakoria tuusaa, tísia kaawe erakometepua taamo tatakoria taamo cheriwemerikopia, pu'kao tamochio, te'ta kaawerumache ihsiamekopapua, yomatiam taamo kiisi kaawe nokariaopia, piipáteka. ¹⁰Nape ki tatakoriwaeme taamo tewasaa teeme, Riosikamera wihtuchame teeme waikáo, ki pichiwaka uuyamekapa teeme pu'ka cheeriao, Apoe Riosio cheeriopa taamoo, yomatiam teeme tatakoriameko tuuka.

Eesusi Riosie Weratiame taamo nehupari

2 No'o Riosichi kukuchiwa, i'ka itapiti aamowichio iyotiamenia, kaawe aamo inateka mochitomichio itapiti ki ka'karumachi wichipuameo. Nape seenekachi aawata piire tatakoria wichisoo, ijinueme teeme aata taamo nehupamerio, riaorósi taamo wenejia taamo Noono tewekachi kahtiamenchio. Puu Eesusi Riosie Weratiamea, wa'a iintomeripua taamo nehupakao, puu Apoea, te'ta tísia kaawerumakapa puuua, taamowichio kaaweruma wichiyameche, ihsiamekapapua. ²Pu'ka Eesusio taamowichio mukiwarichi ahpo nehjariopaopia, yooma taamo tatakoria wikiriataria natetetiam itipikamepua, ki ehpe taawechiami taamochewichio, ahkasi yomatiam i'ka wehjoarichi mochikamewichio, Eesusichi paparakameo.

³E'waka mochisaapu teeme pu'ka Riosi nuurario, pukachi nane'repuame teemea, pichiwa kaawe te'tereka mochitoamekopua Riosichio. ⁴Nape aata ahka cheesoo: “Tísia kaawe teereka yasitoamenia Riosichio”, nape wa'a chiiiao, ki yorame enesaapu Riosi nuurario, kihta Riosichi kaawe teereka yasitoamepua, oowera tísia wistuamepua, kihta pichiwari tiamepua apochio.

⁵Sewina chaniwachio, aaata e'waka yoorameapua Riosi nuurario, pukae e'wewa ihsiwae tetewitiame Riosio, tísia ahpo nakiyaopua Riosio. Pukachi wa'a taamo tiiachi, taamo nane'riame teemea, taamo kaawe tiamekopua Riosichio. ⁶Aaata ahpo Riosichi kaawe teereka yasitoameko tuuyamea, Riosi Taanara Eesusi i'wa weechi yasariachitia, yasitómetepua.

Weemera nuurari

⁷No'o Riosichi nakiwaa, ihji nuurari aamo no'o iyotepiaa, ki weemera simiyame puuuu, puuu wa'apikai tiiapaopua ehkoriaami o'inia simiyame, puuu wa'api puuuu, ehpiami taamo nayewatuaa, pu'kaopa aamoo inamuriapa wa'ási. ⁸Nape wa'a tiiapua, Riosie Weratiameo ahsieme e'wewa iintoriopa, yomatiamé Riosi nuurari e'wepakaopua i'wa weechi oirioio, weemera tiame Riosi nuurari e'wewa, enepakamepua. Ehpeo eemeai Riosieo, yomatiamé ahpo Taana Eesusichi paparamé, ahsepari e'wekame taamo tetewamepua ahpo nuurario. Pukaepa ehkoriaami tukapari Riosi nuurarichi nokisitiamé, puuuu saipatoamepua, ehpeo taamoo Riosi Taanara tahjewarachi mochitoamekopa, Eesusichi paparakao. Ehpeo eemea Eesusi tahjewarachi mochitoamea, kaawe ahpo nakika mochitoamepua.

⁹Aaata piire ahka Eesusi tahjewarachi yasitoame teewasoo, wa'achiaipua nekumesaa ahpo piirechio, tukapachi yasitoamekai chiiamepua pehjo. ¹⁰Nape puuu ahpo piire nakika yasitoamea, Eesusi tahjerawachi kaawe teeretoka yasitoame puuuu, aaataai kihta tatakoriichi wichiteme tiamepua. ¹¹Nape aaata ahpo piirechi nekumeka yasitoamea, wa'a ahpo ma'chitamepua tukaparichi yasitoamekoo, ki ma'chiriameka tiamepua, tukapachi oiyamechitia kiisi ma'chiriachi.

¹²Neeea Riosichi kukuchiwalao, i'ka no'o iyoterichio eee chiiame ka'karuma tuuyewa iyotiamenia aamowichioo, Riosichi aamo te'terepariopa aamoo, Riosio aamoo cheriweriopa tatakoriiriao, Eesusi Riosie Weratiameo aamowichio iintóriae. ¹³Eeme kukuchi yayawarao, i'ka aamo iyotiamene aamowichioo, tísia nane'reka mochitoamekopa Riosie Weratiamechi simiyameo, pu'kao ke'chu naayachisi o'iniasi ahjaka yasitoame.

Aamo tehtemario, i'ka kaawe e'rewa aamowichio iyotiamenia, tísia aiwaio anachaka newitoriopua riorósio, tísia na'ara aamo yoranareriameo.

Aamo kukuchio, i'ka kaawe e'rewa aamowichio iyotiamenia tiameo, aamoo tísia nu'nuntikoioopua pehjo, aamo Riosichi paparamekopua.

¹⁴Eeme yayawaraa, kaawechupena tísia paparakame eemea Riosie Weratiamechio, ke'chu naayachi o'inia ahjaka yasitoamechio.

Eeme tehtemariaiao, kaawechupena eemeai newitokamepua riorósio, tísia anachatoaipua riorósi na'arario, amochi tísia na'ara yoranarewa, Riosi kaaweruma tuuyewarichikamera enepakaopua, tísia utewaeme enepakaopua amochio, riorósi aamo tísia na'arewa nehpuariwichioo.

¹⁵Wa'a tiichipao neea yooma aamoo, chaaniamenia, ka'te pu'sereka mochtomitia eemea, itapiti ki ka'karuma nokiwame i'ka wehjoarichio, ikotukaoui ihtaoui itapiti i'ka wehjoarichi iintuameo. Aaata i'ka wehjoarichi iintuame ikotuka yasitoamea, kiisi nakika yasitoamepua tewekachi taamo Noonoo. ¹⁶Wa'a tiamepua, yooma ki ka'karumaa i'ka wehjoarichie taamo ooweniamea, ki taamo tewekachi Noonoe ooweniamepua, ihjichitia weeechi iintuameaa: yooma ihta taamo tetewao, ki ka'karuma yoranarewa; yooma taamo erakoa ki ka'karuma yoranarewa; tísia paarasarieka yasitonarewa. ¹⁷Ihji weea ahpo kajumite puua, yooma apochi mochikame ti'tijoeri kiisi ki ka'karuma ikotuame ahjama; nape sewina tiichio, puuu Riosi nakiyachitia mochtioamea, ki wahjiamesi ahjameripua Riosi ahjamao.

Napapuka ne'newa, aachintiamera te'ta pichiwarikoo ki pichiwarikooio

¹⁸No'o Riosichi kukuchiwala, waapi teetoamekaitepua epeche epecheche, Riosi ihsiwa kajumiachioipua i'ka wehjoarichio. Inamukame ohjoare eemeapa, aaata iintumio tuuwao, aaata Riosie Weratiame te'ta weruma Seepurawarao. Wee, weeka puuyapamepua wa'asio Riosie Weratiame seepurawao, te'ta Riosie Weratiame Seepurawa ijinuwarao. Wa'a tiichipa epeche epecheche, waapi teetoameko erakoame teemea, Riosi i'ka wehjoarichi ihsia, kajumiachioipua. ¹⁹Puuu Riosie Weratiame seepurawaa, ahkasioi taamo ti'tiopachiamioi e'enariameaipua ookapio, ki pichiwa taamo Paamira Eesusichi paparame. Puua ki taamo ijinuwara eneriamepua taamo Riosichi poponiwachio pipiniwachioipua tiameo, poanatakamekapapua, tamochitia pichiwa Riosichi paparame enesaapua, taamo ahjama itipimeriaipua. Nape wa'a noonoitamea, taamo ma'chiamie tetewimichio iintuamekopua taamo ti'tiopachioi Eesusi seepurawa, nape ki yoomahka.

²⁰Nape eemea ki poanatuamepua taamo Riosichi paparamechio, eemea amochi uukamekapa te'ta Kaaweruma tiamera Riosi Riosiwario, Riosi aamo ki'yariao, pukaepa machika mochtioame eemea, taamo Paamira Eesusi pichiwari tiiao. ²¹Pukaepa aamo iyotepamenia, aamo machiyamekopa Eesusichi simiyame pichiwarirao, kii ki aamo machiyamekopa. Eeme wa'api nane'riamepu, wistukio ka'chitia pichiwarichi eenamekopua. ²²¿Aatana ohjoarepu te'ta wistuamea? Naati puua, ki Riosie

Weratiameko tuuyame Eesusio, ki Riosi tiarichi eenameko tuuyame. Puuupua, te'ta Riosie Weratiame seepurawaraa, ki uuka tetewamekamera Eesusi Riosi Taanarao, apoe te'ta Eesusi Noonoraoi. ²³Aawataai ki Riosichi eenameko tuuyamea Eesusio, ki apochi iniwaeka yasitoamepua te'ta Eesusi Noonoraoi; nape, Riosichi eenameko tuuyamea Eesusio, apochi iinueka yasitoamepua te'ta Eesusi Noonorao.

²⁴Pukaepa kaawe neesetomitiamua, pu'ka Riosichi simiyame tuuyewario, pukeri o'inetiachisi aamo inamuriao. Wa'a te'teretoka neesetosaa eeme, pukachi Riosi Taanarachiche te'tereriame enemapu eemea, Eesusi Noonorachi te'teretokameche tiame. ²⁵Teemea wa'a te'teretokamea, kiapuame teemea waikao, Riosie Weratiame taamo kiapo tuutiameopua, kiisi wahjiamesi ahjaniameopua weemera ahjari.

²⁶Pu'ka wa'a tiiame aamo iyotepamenia, kaawe aamo neesetoka mochtomichiopua aamo wihkuenariameo. ²⁷Eemea tísia machika mochtitoamekapaopua Eesusi Riosie Weratiame pichiwarirao, ki aatae aamo epeche masitepuamepua, Riosi Riosiwarikamera aamo masitiamekopua, amochi yasitokao. Puuu Riosi Riosiwarikamera inisiamepua aamo te'ta masitekao, ihtáoi Riosichi simiyameo. Puuu Riosiwari masitiaa, te'ta pichiwarikamera puuua, kiisi wistúki. Wa'a tiiachipa eemea, pu'ka Riosiwari amochi yasitoa masitia, e'weka mochtitopuapua, pu'ka Eesusi Riosie Weratiamechiche, Riosiwarichi teetoka.

²⁸Ehpeo no'o Riosichi kukuchiwala, peewatiame mochtomitia eemea Riosie Weratiamechio, ki aamo suuwe erapatepuaiachio aamo te'teretoriao, pu'ka Riosie Weratiame enasooopua te'ta taawechio; epeche kaawe ahjachi erakoka mochtitoniamea, pu'ka taawechi te'ta enameriwichio. ²⁹Eemea nane'riame enesaa Riosie Weratiameo, kaawerumache ihsiamekoopua pu'kao, nane'remete eemea tiameo, yooma aata kaawerumache nokayameo, Riosi tatanarachitia te'teriamiakopua, Riosi Taanara Eesusichi enepakamekopua.

Riosi te'ta tatanara

3 Eemea i'ka no'o chiiiao, inataka ne'nemitiapua: Nee, taamo Noono Riosia, ki teesa taamo nakiyamepua, ahkasioi puuua taamoo, ahpo tatana taamo teewamepuá; pichiwa wa'a te'tiamekate teeméa. Nape wahjachia, ki Riosichi paparaka mochtitoamekapaopua, ki taamo Riosi tatanarachitia tetewamepua, kihta tewekachi kahtiamé Noonochi te'teriapa. ²No'o Riosichi poponiwa pipiniwaa tiame, ¡Riosi tatanarapa teeméa! Teemea ki te'ta kaawe nane'riamepua taamo weerewa te'teremiao, nape wahka ihtoriachio Eesusi eenechi tewekachi o'inia tekisoo, Eesusi weerewaeka eenaria tetewapao, pu'ka weerewa taamo weerewaameriko erakoame teemea.

³Yooma pu'ka puuyetoka mochikamea, Eesusi ye'karichi ahjama mochipuameo, tísia piipari tiame ahpo neesetoka mochimetepua, iiweta i'wa wehjoarichi mochitoaiopua pehjo, te'ta Eesusi piipari tiachitia.

⁴Ki ahpo piipari neesetoka mochitoamea, ki iyorika mochitoamepua Riosi nuurario, puuu ki iyorika mochikamea pu'ka nuurario, tatakoriame puuuu. ⁵Eemea nane'riamepua Eesusi Riosie Weratiameo, apoeopua kiisi ihta tatakorikameo, i'wa wehjoarichi eenariopua taamo tatakoriria kokosapuame, ahsieme cho'wemiao. ⁶Aaata te'ta Riosie Weratiamechi kaawe teeretoamea, kiisi oiyamepua tatakoriwachio; tatakoriwachi oika pu'seriamea, kihta Riosie Weratiamechi teeretoamepua, puuuu Riosie Weratiameo, kiisi machiyameka teeretoka yasitoamepua. ⁷No'o Riosichi kukuchíwaa, ka'te aamo toimitia wihkuemichioo aataoi; aaata kaawerumache yooramea, kaaweruma puuuu, Riosie Weratiameka tiamepua, ahpo kaaweruma tiiao. ⁸Nape tatakorika pu'seriamea, riaorósikamerachi tiame puuuu, riaorósi iinuwaru. Riaorósia, Satanasika tiame puuuu, Satanasia iinuwarakapa. Satanasia, te'ta tatakorika pu'seriamepua, ahkasi te'ta ehkoriamesi o'inia. Nape Eesusi Riosi Taanara, Satanasia taamo ahpo ijinuwa eenepatenariopao, taamo wa'inekemia eenariamepua Satanasio, ki taamo Riosi tatanara enejeriopa pu'kao.

⁹Aaataai te'ta Riosi taanarachitia yasitoamea, kiisi tatakorika yasitonariamepua, weamera ahjari inuekapapua Riosichio Riosie ahpo kiatiamé. Pukaepa ki itipiamepua tatakorika simitewachio, enechi naawakameka tiame enepatetiapaopua, Riosieo. Puuuu ahpo yooreminaopua iikachio, Riosi taanara enepakame puuuapa. ¹⁰Nane'repori tiame teemea, Riosi tatanara aatanakoo, riaorósi ijinuwarao aatanakoiopua, ahpo nokiwamechi ma'chiamé tetewiniamepua, aatanakamerakoo. Aawataai ki kaaweruma

yooraka yasitoamea, kiisioi nakika yasitoame enesaa ahpo piirechio, ki Riosichi tatanarachitia te'teriamé, riaorósikamera ijinuwarapua.



Kaainia ahpo pooni me'yare. (3:12)

Napatika ahpo nakika mochitotaria naaju, aaatachioipua

¹¹Ki'yamisi o'inia taamo tuuyesiwa inamutiamepua, puuu wa'api ihjia: taamo ahpo nakika mochitopuamepua. ¹²Teemea ki Kaainitaru ohjoériachitia ohjoétometepua, ehkoriami naayachikoio pehjo, ohjoeriachitiao.

Puuu Kaainia, riaorósi iinuwara enekamepuáa, ahpo pooni me'yakamekapa. ¿Ihtatia tiiachipa wa'a iintoriarepua ahpo pooni me'yakao? Wee, puuu Kaainia, na'arari inataka yasitoriamekapa wa'a iintokamepua, pu'ka poonira Aaweri tewaniamea, kaawerumache yooraka yasitoamekopa, wa'a yoratiamepua.

¹³ Wa'a tiiachipa eeme no'o Riosichi kukuchiwaa, aamo nekumeka teteiwai i'ka wehjoarichi mochikameeo, ka'te iinsa tiameko erakoka mochitomitiapua. Puuu aamo ku'kume e'raka tetewamea, ehkoriai naayachi Kaaini teereriachitia, te'tereka mochitoamepua. ¹⁴ Nape teemea Eesusichi paparamea, taamo kaawe nakika mochitoamepua, aaataoi kaawe e'raka nayeweka. Wa'a te'teriapa teemea, nane'riamepua taamoo, ki aiwamerikopua oosa simiyamechi mukiwario, teemea weemera ahjarichi teetoapa, taamo Noono tewekachi kahtiamé ki'yaria. Aaataai ki ahpo piirechi nakika yasitoamea, ahjaka oiaiopua mukukameka tiamepua. Puuu wa'apitia itipisaa, puuu eeyowa tiamepua oosa mukiwachi wichipuameo. ¹⁵ Aaataai ahpo piirechi nekumeka yasitoamea, tijoe ko'yameka tiamepua; eeme wa'apiai nane'riamepua pu'kao, aaataai tijoe ko'yameo, kiisi kiapuamekopua, ki wahjiamesi ahjario. ¹⁶ Teemea Eesusi Riosie Weratiame iintoriaeo, te'ta pichiwarikamera nakiwari machiyamepua, ki teesa taamo nakiyapao, kurusichi mukuriopa, ki nu'uti kokosa tiame aiwaka taamowichioo, apoe ahpo kaawe e'rachi wa'api. Wa'achitia teemeai taamo pooni pipiniwa Riosichi paparamewichioo, ihtaai aiwari aiwaiopua pu'kawichioo, kaawe erakometepua, wa'a teeka tetewiteniamepua tamochio, te'ta kaaweruma Riosichi eename nakiniameo. ¹⁷ Aaata ahka soparame iinuekai yasitoameapua ahpowichioo, wa'a tiiaiopua ahpo piirechio, itapitichi tísia tooremuka yasitoame tetewaiopua kihta ihkorewae ku'isaopua pu'kao, ¿ihtatiana, te'ta kaaweruma nakiwari Riosichi eename iinuetapua? ¹⁸ No'o kukuchiwaa, taamo aaata nakiwaria, tamoe iintokache tetewiteniamepua, ki oowera chanikache.

Pichiwa cheriwetiameko tatakoririao

¹⁹ Wa'a teeresoo taamo iintowachi tetewima teemea, taamo te'ta Riosi pichiwarichi te'teriamekopua. Wa'a te'teriapa teemea, te'ta pichiwa ki kokosapo erakoame teemea, Riosi te'ta taawechi ti'tijoeri katewiachio. ²⁰ Tahpitika e'roiopua taamoo, ki nu'utiko taamo tatakoririao, te'ta taamo pichiwari e'raka cheriwejeraka itasoo Riosichio, cheriwepuameche teemea Riosieo, apoeo ma'chiamé tetewamekapa taamo iikachio, tahpitika e'raka taamo itaya cheriwejerao. Wa'a iintomeri Riosia, yomatiamé tiamekapa nane'rewao. ²¹ Nape kihta weruma tatakori tamochi pehtiamekoio

Riosia, taamo cheriwemeripua tiameo, ²²ahkasioi tísia nu'utikoi taamo tatakoririáo. Wa'a iintoame taamo Noono Riosia, ahpo mochijerachitia mochitoameo, ahpo nuurariwa e'weka. ²³Taamo Noono Riosi nuuraria ihjipua: ahpo Taana Eesusichiche paparaka mochitoniamé, te'ta pichiware taamowichio iintorio erakoniamé Eesúsio, te'ta kaawe taamo ahpo nakika mochitoniamé, te'ta apoeo, taamo nuureriachitia. ²⁴Yooma aaata pu'ka tewekachi taamo Noono nuurarira e'weka mochitoamea, taamo Noono tewekachi kahtiaméchi te'tereka mochitoamepua; Apoe taamo Noono tewekachi kahtiaméai pukachi. Teemea tamochi kahtiaméko nane'riamepua Riosio, tamochi yasitoamekopua Riosiwarirao.

Riosi Riosiwarira nayewaniame; Satanasi na'arari tijoeturiwarira tiame

4 Aamo tísia no'o nakiyaa, ka'te yooma Riosichi simiyame masitio tuuyame pichikemitia. Nane'reka uumitia pu'kao, kaawe inataka, seenekachi ki Riosichi eenamekoi enema puuuu; i'ka weechio ki ookapi ohjoamepua ma'masiteri, puuuu ki pichiwaka masitiame. ²Aaata ma'masitari Riosi Riosiwari apochi yachatoamea, eee cheeka ahpo masitewachi ma'chitamapua: “Riosi tijoe tijoetukameo, Eesusi Riosie Weratiameko”, tuumapua. ³Ki Riosiko tuuyamea Eesusi Riosie Weratiameo, wa'a chiiachi nane'rema teemea ki pichiwa chiiamekoo, teesaio ki apochi iinuemeko Riosi Riosiwario; puuuu, Satanasi kamera na'rari tijoeturi apochi yachatoamepua, Riosie Weratiameoopua, te'ta seepurawarakamera. Inamuriare eemeapa, aaata enamerikoo, Riosie Weratiame te'ta seepurawa. Weh, pu'kao neeeaa, eenario tuuyame neeeapa, puuu Riosie Weratiame seepurawaraa Satanasia, i'wa wehjoarichi ihsiaméko puuuapa, Riosie Weratiame ijinuwara wa'inewa ihsikaopua.

⁴Eeme no'o Riosichi poponiwaa pipiniwaa tiame, Riosi tatanarakamera eemeapa wa'asi, pukaepa eemea newitokamepa eemea, pu'ka Satanasi ahpo ma'masitarie wihtuki masitiameo. Eemea ki yuumpatiamepua pukaepo, pu'ka Riosi Riosiwario amochi yasitoamekoopua wa'asio, epeche tísia utewaemeraopua, ki Satanasi te'ta utewarirachitiaopua, i'ka wehjoarichi yasaka, ihsiaopua. ⁵Puuu ma'masitari wiwisituamea, i'wa wehjoarichiche ohjoemerapua, Satanasi ye'kariwaeka mochitoame. Pukaepa ki Riosi kaaweruma tuuyewarikamera keepunariamea, Satanasi ma'masitarikamera ki ka'karumakamera masitia keepunariamepua. ⁶Sewina te'terewachio, teemea Riosi ijinuwarapua. Puuu Riosi nakiyamea, taamo ahjama nayewaka pu'seriamépuu Riosichi simiyameo; nape ki nakika mochitoamea Riosio, kiisi pu'seriamépuu taamo ahjama nayewakao. Wa'a teeka nane'remeri teemea, aatanakamera pichiwaka

nakiyamekopua Riosio, aatanakamerakopua tiameo, ki pichiwaka nakiyamekopua Riosio, oowera wihkuaka nayewamekopua.

Ahpo nakika mochtitopua

⁷Eeme no'o poponiwa pipiniwa tiamea, tísia no'oe nakika mochtitoamea, teeme Riosichi poponiwaa pipiniwaa tiame taamo kaawe nakika mochtitometepua, ahkasi taamo wahjachioi, pu'ka nakiwario Riosichi eenamekopao. Aata nakika uuyamea aatao, kaawe tiamepua Riosichio, Riosi taanarachitia. ⁸Aata ki nakika tetewamea ahpo wahjachio, kihta iinuemepua Riosi nakiwariopua apochio, Riosia apoe te'ta pichiwari nakiwarikapapua, yomatiamé aataoi nakiyame. ⁹Riosia tísia taamo ahpo nakiya tetewitenariapaopua, ahpo Taana tijoetutesa uhjurekamepua i'ka wehjoarichio, taamo weemera ahjari kiapuawichioopua, pu'ka ahpo piiripi wa'api Taana iintóriae. ¹⁰Te'ta ki nu'uti nakiwaria, Riosie taamo tetewitetiamepua, ki tamoekamera Riosio, apoe Riosio ahpo Taanakamera uhjurakamekopua, ahpo Taanakamera iintoriawichio, taamo cheriwariopua taamo tatakoririao, yomatiamé ahsieme natetekaopua.

¹¹Wa'a teesoo eeme no'o Riosichi poponiwaa pipiniwaa tiamé, Riosio ki teesa taamo nakiyame enesoo, wa'achitia teemeai tísia kaawe taamo ahpo nakika mochtitometepua. ¹²Riosia seenepioi, ki aatae tetewiniamepua; nape ahpo kaawe nakika mochtitoniachi, tetewiniamepua pukachio, te'ta kaaweruma Riosichi eename nakiwariaa, puuu Riosi nakirewaa, kaawe ahpo nakika mochtitoamerakachi, epeche epecheche tamochi teetopasiamepua.

¹³Teemea taamoo, ki taamo ahpo nakiwariche nane'riame teemea, taamoo Riosichio kaawe te'teriamekoo, apoekamerakopua Riosio, ahpo Riosiwarié tamochi yasitoamekopua, ahpo Riosiwariéopua taamo inatarichio chaanesika, taamo tísia kaawe tiamekopua apochio. ¹⁴Teemea tiameo, Riosi Taanarao, tamoe wa'api pusie tetewikamepua pu'kao, pukaepa teemea Eesusi Noonorao, apoe wa'api tamochi uhjurario pichiwatamepua, yooma taamo i'ka wehjoarichi mochikameo, newipatemichioopua. ¹⁵Riosia aatachioi Eesusio Riosi wa'apichi eenameko tuusoo, Riosie wa'api tijoetutetiameko tuusoo, Riosia pukachi pakiyamepua iikarachio, pukachi ohjoretomiaopua; puuu wa'a ikitiamea Riosieo tijoéa oowitiameaio, tísia kaaweruma te'teretoamepua Riosichio, Riosia tiameo pukachio.

¹⁶Naakona wa'a tiiatepua, ma'chiamé pahtiamé teemea ehpeo, achini tiameko Riosi nakiwariopua tamochio; eje'e pichiwa wa'a tiame puua, pukaepa wa'a tiiachipa pukachio, te'ta pichiwariko erakoame teemea pu'kao. Riosio te'ta nakiwarikopaopua pu'kao,

aaata ahpo wahjachi tiame nakika yasitoamea, Riosichi ahpo teereka yasitoamepua; Riosiai pukachi teereka kahtiamepua. ¹⁷Wa'a te'teretosaa teemea taamo wahjachi kaawe nakika mochtioniameo, kihta taamo seeweka mochtomete teemea, wahka ihtoriachi ti'tijoeri ki kaawe noonokame, te'ta Riosi katewemerichio, te'ta Riosie Weratiame nakika yasitoriachitia, mochtioamekapa. ¹⁸Aaataai te'ta Riosi nakiyachitia ahpo nakika mochtioniachio, ki'tiamepua Riosi kokosari majaniamea, wahka ihtori taawechiopua ti'tijoeri te'ta katewemiachio. Ohsotia puuu majaniamea, ahpo pujayamepua tamochio, Riosi nakiyachitia taamo te'ta ahpo nakika mochtosoo. Nape Riosi kokosari majaka yasitoamea, ki Riosi nakika yasitojerachitia, yasitoamekapa, wa'a e'ramepua.

¹⁹Teemea ahpo nakika mochtioniameo, Riosie pepenipakamepua, ahpo Taana Eesusichi taamo tetewiterie, kurusichi taamowichio mukiwarie. ²⁰Aaata piire ahka cheesaa: “Nakiyamenia Riosio”, nape wa'a chiiapua, nekumesaa ahpo piirechio, wistuame puuú. Aaata ki nakiyamea ahpo piirechio pusie teteiwameoipua pu'kao, ¿osopenana nakitarepua Riosio ki ahpo pusie tetewao? Nakiniamea ki naawesarieche tetewiteniamepua, yoorakache tetewiteniamepua. ²¹I'ka nuurari taamo ki'yarepu Eesusi Riosie Weratiamea: ki Riosiche nakika mochtomete teemea, teemea ohso kaawe taamo piirechio, nakika mochtometepua tiaméo.

Ki kaaweruma weemuwao, newitoniamie

5 Aaata piire Eesusiko e'rame Riosie Weratiameo, pu'kao Riosi tiarachi o'inia eenamekoopua, puuu Riosi taanaraka tiame puuuapa. Aaata tewekachi kahtiamie Noonora nakiyamea, wa'achitia nakiyamepua tiameo, pu'ka tatanarao. ²Riosi nakiyame enesaa teemea, e'waka mochtisaa tiame pu'ka nuurariwaoio, pukachi nane'reka mochtoma teemea, Riosi tatanarao, nakika mochtopuameo. ³Teemea Riosiwichio te'ta pichiwari nakiwaria, Riosi nuurariwa e'weka yasitoniamepua; puuu e'weniamea kihta pehtiamekaitepua, ewanarewawichioo. ⁴Taamo Eesusichi paparaniamechi o'inia, eename taamo Riosi nuurariwa e'waka yasinarewaa; pukae newitoame teemea ki ka'karuma yoranarewa weemuwao. ⁵Newitoka machenasiamie pu'ka ki ka'karuma yoranarewao, Eesusi utewarira apochi yachatoamekapa wa'a tiamepua, Riosi tiarichi eenameko e'ramakopua Riosie Weratiameo, Riosi Taanarakopua naawakameo.

Eesusi Riosie Weratiame naania tiame aatanakoo

⁶Teemea nane'riamepua Eesusi Riosie Weratiameo, Riosi Taanarakoopua, neerochi paatotioi machenoio, tewekachi kahtiamie

taamo Noono tewekachi kahtiamée ma'chitatiamekopua pu'kao, ahpo Taana teewakao. Piirechi akana o'inia eenameko taamo nane'riaa, kurusichi mukuyai tewekachi kahtiamée taamo Noono nayeweriapua, ahpo Noono teewakao. Taamo nane'riaa tiameo, Riosi Riosiwari puuua, tamochi iikachi yasitoka, pichiwa Riosi Taanarako taamo tuuyamekopua pu'kao, te'ta Riosi tiarichi o'inia naawakame. ⁷Wa'a tiiachipa paikapua tewekachio, te'ta Eesusi pichiwatamea aatanakoo: piiripia, taamo Noono Riosi tewekachi kahtiamépua, piirea Apoe Riosi Naerapua, piirechia tiameo, Apoe taamo Noono Riosiwariapua, tewekachi kahtiamée; ihji paikaa piiripikaitepua. ⁸I'wa wehjoarichi taamowichioo, te'ta Eesusi Riosie Weratiame aatanataa, ihji paikapua: piiripia Riosi Riosiwariapua, taamo iikachi tuuyame; piirea, Eesusi paatotioi neerochi machenoipua, ahpo Noonoe tewekachi kahtiamée nayewetiame, ahpo Taana teewakao; piirea, Eesusi kurusichi mukuyai taamowichio erawisukao, ahpo Noono nayeweriapua tewekachi kahtiamée, ahpo Noono teewakao. ⁹Weh, pichikiame enesaa teeme ti'tijoeri chaachapao, epeche pichikemetepu teeme Riosi chiiao, epeche ki teesa nateyakamera. Pukaepa te'ta pichikemete teemea Riosi chiiao, yomatiamée Riosi Taanarachi simiyameo. ¹⁰Riosi Taanarachi paparakamea, ahpo wa'apichi i'toamepua Riosi Riosiwari chiiao. Ki pichikiamea Riosi chiiao, wistuchamepua Riosi chiiao, ki pichikiamekapapua Riosi Taanarachi simiyameo, apoe Riosi cheeriao. ¹¹Riosi taamowichio te'ta ma'chitaa, ihji iintoriapua: ki wahjiamesi ahjari taamo ki'yaria, yooma aata taamoo, ahpo Taanachi paparakameo, pu'ka Eesusi iintorioa, taamowichio iintorio erakoamekoo. ¹²Aata ahpo nehpuwarichitia iniwaemea pu'ka Riosi Taanarao, pu'kakamera ki'yakame Riosia, ki wahjiamesi weemera ahjario. Nape ki ahpo nehpuwarichitia apochi teetoameo, Riosi Taanarao, kiisi kiatiamépua Riosieo, pu'ka weemera ahjari ki wahjiameo.

Kajuyachi kuwateka tuuyewari

¹³Nee Waania i'ka aamo iyojurachio, te'ta pichiwako nane'remichio iyotiamenia pukachio, amochi iinuemekoopua wa'asi, pu'ka weemera ahjario, te'ta Riosi Taanarachi paparakamekapao.

¹⁴Pukaepa tísia ahjachi erakoame teemea, yooma ihtaioi taamo tatakoria cheriwepua inatetioo, taamo inamumerikopua puuua, wa'a e'raka kahtiamekapaopua wa'asi. ¹⁵Wa'a teeso Riosia, ki wa'atia itipimeripua, ki taamo inamukaopua. Nane'riame enesaa teeme taamoo keepuamekoopua pu'kao, nane'riame enemeriai teeme waikao, taamo tatakoria cheriwemichio itanesoo, taamo cheriwemerikohepua.

¹⁶Aaata na'ara ihsiamete tetewisaapua ahpo Riosichi pooniwao piiniwaoiopua, pu'ka wa'a ihsiwamewichioo Riosichi itamete muuua ku'iwao, pu'kao ahpo katewemichio, weemera te'teremichio. Nape taamo Riosichi Taanarachi paparamo, itapiti ki kaawe tiame tatakorisoo, pu'ka tatakoririawichio Riosia taamoo, ki taamo ipaka tetewimapua ki apochio, oosa simiyame mukiwachio. Nape ki ahpo Taanachi paparamo Riosia, pu'ka tatakoririawichio Riosia, ki nakika teteimapua apochio, ipaka tetewimapua pu'kao, ki wahjiamesi ki ahpo ahjama mochimichio, puuu wa'a tiame Riosie ipaniamea, oosa mukiwa tiamera puuua. Pu'ka ki Riosichi te'teriamete tatakoririawichio, ki aamo itapo tuuyamenia Riosie cheriwepuao; aapoe wa'api Riosie itanemeriopua pu'kao, ahpo tatakoriria cheriwepuawichio. ¹⁷Yooma ihta ki kaawe nokiamea tatakoriopua; nape iintuaitepua tiame ki kaawe iintotiamea, pu'kawichio ki oosa simiyame mukiwarichi taamo i'toamea, Riosie ijinuwarakamera enepatetiamekapa.

¹⁸Nane'reka mochitoame teemea, aaata Riosie Noonoeke yasitoame, ki tatakorika yasitonariamekopua, ahpo neesetoka yasitoamekopua pu'kao tatakoriniameo; Riosie Taanara Eesusieopua apochi inateka yasitoniamekapa, apoe Riosie warieo. Pukaepa Satanasia ka'chi iika yuumpame tiamepua pu'kao, ahpokamera tatakoriniame na'naritomichio. ¹⁹Teemea Riosie ijinuwarakai, nane'riame teemea i'wa taamo ohjoekachio, Satanasi ye'karitere taamo mochikamekopua; pukaepa taamo kaawe neesetoka mochitometepua. ²⁰Nane'riame teemea tiameo, Riosie ahpo Taanachi i'ka wehjoarichi tekikamekopua taamo mochikachio, apoe taamo machitanariapa, aatanakoopua te'ta pichiwarieo Riosie. Wa'a tiachipa teemea pukachi te'ta pichiwa Riosie, pirena mochitoamepua, pu'ka Riosie Taanarachi te'teretoka, pu'ka Eesusi Riosie Weratiamechi. Wa'a teesoo ihji Eesusi Riosie Weratiamea, Apoepua te'ta Riosie pichiwarieo, te'ta ki wahjiamesi ahjamea. Wa'a tiachipao apoepua taamoo, te'ta ki'yameraa ki wahjiamesi ahjario.

²¹No'o Riosie kukuchiwaa, ka'te paparamitia eemea itapiti riositaniametepua.

Wee, wa'asi ihji no'o aamo tuuyeka iyotiaa. Wa'a te'teremitiapua naaju.